

Mid-Day Dogri News Bulletin, 22nd March 2025

समे — 12:25

<><><><><><>

LG-Purple Fest

उपराज्यपाल मनोज सिन्हा होरें दिव्यांग जनं दी मजबूत इच्छा शक्ति, पक्के धेइयै ते प्रतिभा दी सराहना कीती। उनें जम्मू कश्मीर गी दिव्यांग जने लेई सुलभ ते समावेशी क्षेत्र बनाने लेई आश्वासन दित्ता। सिन्हा होरें कल जम्मू दे राजभवन च होआ'रदे समारोह पर्वल उत्सव-2025 दे मौके पर एह गल्ल आकखी। इस समारोह दा मकसद दिव्यांग जनं आस्तै जागरूकता पैदा करना ते उनेंगी सशक्त करना हा। उनें आखेआ जे साढ़ी सरकारै दिव्यांग जनं गी सशक्त करने आस्तै बड़ी गै खास पैहलकदमियां आंदिया न तां जे उनेंगी उंदे अधिकार मिली सकन।

<><><><><><>

Rana Forest

जंगलात मैहकमे दे मंत्री जावेद अहमद राणा होरें जम्मू कश्मीर दे जांगली इलाकें दे संरक्षण दी जरूरतै पर जोर दित्ता ऐ। जंगलात सरबंधी अंतर्राष्ट्रीय ध्याड़े दे सिलसिले च कल जम्मू कश्मीर जंगलात विभाग आस्सेआ जम्मू दे कन्वेंशन सेंटर च आयोजित इक कार्यक्रम च बोलदे होई मंत्री होरें इस गल्ले पर लोह पाई जे साढ़े जंगलात जलवायु गी नियमित रखने, ब्हा ते पानी गी साफ सुथरा रखने, कुदरत दा तवाजन ते जैविक बन सबन्नता बनाई रखने च बी मती महतवै आली भूमका निभांदे न ते इस सब्बै दे कारण गै धरती पर जिएं जैतुएं, पक्खरू पखेरूएं ते माहनू दी सलामती जकीनी बनदी ऐ।

<><><><><><>

Satish Outreach

ट्रांसपोर्ट मंत्री सतीश शर्मा होरें कल छम्ब विधानसभा हल्के दे दऊं दूर दरेड़े इलाकें सेल्योट ते राह-सेज्यार पंचैत च जनता दरबार लोआइयै लोकें दिएं दिक्कतें समस्याएं ते मंगें दा हल्ल कड्डने लेई निर्देश जारी कीतें एहदे इलावा उनें हरदमलवारा तगर 800 मीटर लम्मी सड़कै पर लुक्क पाने, एहदे कन्ने केई चाल्ली ते सुरखा कंध दे कम्में गी बी शुरू करोआया। इस विकास कम्में गी मैहकमा पीडब्ल्यूडी आस्सेआ अंदाजन कोई 46 लक्ख रुपे दी लागत कन्नै तोड़ चाढ़ेआ जाग। मंत्री होरें इस इलाके च 100 के.बी छमता दे ट्रांसफार्मर गी बी चालू कराया। कैप दरान केई लोकें अपनी इलाकें दिएं ते व्यक्तिगत समस्याएं बी उंदे

सामने रखियां, जिनेंगी धरोइयै सुनने परैंत मंत्री होरें उंदे तोले ते पैहल दी बिनाह पर नबेड़ने दा भरोसा दोआया।

<><><><><><>

World Water Day

अज्ज पानी सरबंधी कुल संसारी ध्याड़ा ऐ, जिसी हर ब'रे 22 मार्च गी विश्व जल दिवस दे रूपै च मनाया जंदा ऐ। इस कार्यक्रम गी मनाने दा मकसद साफ पानी दे महत्व गी उजागर करना ते पानी दे कुदरती वसीले दे संरक्षण लेई लोकें गी प्रेरत करना ऐ। विश्व जल दिवस दा 2025 लेई विषय सार ऐ "ग्लेशियर संरक्षण" जेह्दा मकसद धरती दे बधदे तापमान करी तेजिया नै पिघलदे जा'रदे ग्लेशियरे गी बचाने बारे जागरूक करना ऐ, की जे साढ़े एह ग्लेशियर दुनिया भरै च साफ पानी दे अस्सल जरिया न। प्रधानमंत्री नरेन्द्र मोदी होरें विश्व जल दिवस दे मौके पर अपने सनेए च पानी दे संरक्षण ते सतत विकास दे अपने धेइयै गी पही पक्का कीता ऐ। उनें आखेआ ऐ जे पानी सदिएं मिां सब्बने सभ्यताएं दी जीवन रेखा रेहा ऐ, इस करियै इसी ओने आलिएं पीढ़िएं लेई साम्बियै रखना साढ़ा सब्बने दा फर्ज बनदा ऐ।

<><><><><><>

Earth Hour

भारत बी अज्ज दुनिया दे सब्बने शा बड्डे ते जमीनी सतह पर मनाए जाने आले आयोजन "अर्थ आवर" च शामिल हाने जा'रदा ऐ। आम तौरा पर हर ब'रे 22 मार्च गी संजा'लै साढ़े 8 बजे कोला साढ़े 9 बजे तोड़ी सब्बै बत्तियां स्हालियै दुनिया भरै दे देश पर्यावरण ते अपनी धरती दी हिफाजत लेई अपना निश्चा पक्का करदे न, पर एकती एहदे कन्नो कन्नी पानी दे संरक्षण बक्खी विशेष ध्यान दितता जा'रदा ऐ। इस आयोजन दा मकसद अपनी धरती गी बेहतर थाहर बनाने लेई सब्बनें दी इकजुटता दा संदेश देना ऐ। इस ब'रे लेई इस ध्याड़े दा विषय सार ऐ "पानी बारे सयाने बनो"।

<><><><><><>

Sports Activities

युवा सेवाएं ते खेड्डें सरबंधी मैहकमे आस्सेआ समाज कल्याण मैहकमे दे सैहयोग कन्नै "बेटी बचाओ बेटी पढ़ाओ" ते नशा मुक्त भारत अभियान" तैह्त केई खेड्ड गतिविधिएं दा सिलसिला शुरू कीता गेदा ऐ जेह्दे तैह्त कल कुड़िएं लेई रस्सा टप्पने, रस्सा कशी, टैनिस

दी गेंद कन्नै क्रिकेट मैच ते वालीबाल दे मकाबले कराए गे जेहदे च बच्चिएं बधी चढ़ियै हिस्सा लैता। इससै चाल्ली जागतें च बी नरोई सेहत ते नशे कोला बचने लेई जागरूकता पैदा करने आस्तै बी किश मकाबले कराए गे।

<><><><><><>

IPL

इंडियन प्रीमियर लीग दा 18मां संस्करण अज्जै थमां शुरू होआ'रदा ऐ। उद्घाटनी मैच च अज्ज संजा रॉयल चैलेजर्स बैंगलुरु दा मकाबला पिछली बारी दी जित्ती दी टीम कोलकाता नाईट राईडर्स कन्नै कोलकाता दे ईडन गार्डन मैदान च होग। मैच सजां साढ़े 7 बजे शुरू होग। प्रतियोगिता च 10एं टीमें दे 74 मैच होंगन। फाइनल मैच 25 मई गी खेड्डेआ जाग। मैच कोला पेहले आईपीएल 2025 दा रंगारंग कार्यक्रम कन्नै शानदार उद्घाटन कीता जाग।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम "मन की बात" इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न।

<><><><><><>